



M. h. 1924

Purgation, Practica

PK

Cometen:

1576-88.

1) — 15)



**Practica / auff das Jar /**  
**M. D. L. X II. Durch Gregorium**  
**Fabricium / der Philosophy vnd**  
**Medicin Doctorem zu**  
**Windsheim gestelt.**

Regierende Herren dises Jars  
 sind /

Venus.

Saturnus.

Mars.

Mercurius.



*Nürnberg (1561)*





Faint, illegible text, likely bleed-through from the reverse side of the page.

Faint, illegible text, likely bleed-through from the reverse side of the page.

Faint, illegible text, likely bleed-through from the reverse side of the page.





Den Ehrenuesten / Er-  
barn / Fürsichtigen / Ersamen vnd  
Wolweisen Herren / Burgermeistern vnd Rathe/  
der löblichen des Heiligen Reichsstadt  
Windßheim / meinen günsti-  
gen vnd gebietenden  
Herren.

**H**renueste / Erbare / Fürsich-  
tige / Ersame vnd Wolweise Herren / Ewern  
fürsichtigen Weißheiten sind meine gutwillig  
dienst yeder zeit möglichs fleisses beuor. Güns-  
stige liebe Herren / ich weiß mich sonder zweiffel noch wol  
zu erinnern der wolthaten / so mir verschiner zeit / von E.  
S. W. beschehen / vnd widerfaren sindt. Damit ich aber  
widerumb mein danckbarlichs gemüt gegen E. S. W. bez-  
zeugen vnd erklären möchte / hab ich dieses mein rinfügigs  
Prognosticon welches auff das künsttliche M. D. L XII. Jar  
gestellet ist / E. S. W. zuschreiben vnd dediciren wollen /  
mit dienstlicher bitt / E. S. W. wollen solches von mir / zu  
günstigem gefallen annemen / vnd zum besten anslegen /  
Vnd thu mich htemit E. S. W. dienstlichen bes-  
felhen. Datum Windßheim / den 3 Augusti /  
Anno Christi 1 5 61.

E. S. W.

dienstwilliger

Gregorius Fabricius D.

A ij

Das



## Das I. Capitel / von den Herren oder regierenden Planeten dieses Jars.

**W**ls ich die Figuren der Reuolution vnd die positus planetarum in signis Zodiaci fleissig betrachtet / vnd gegen einander gehalten habe / So befinde ich / das die holdselige Venus mit den meisten dignitatibus begabt ist / Vñ nach jr der mißgünstige Saturnus / Darumb sie diß Jar für allen andern Planeten / nach irer art vnd Eigenschafft / diese vnderste vergengliche welt fürnemblichen regieren werde / Doch haben sie zu mitregenten / den Martem vñd Mercurium / welche mit Krieg vnd andern mancherley Practicken in diesem Jar was selzams stifften werden.

## Das II. Capitel / von den vier zeytten dieses Jars / Auch wie in den selbigen der lufft durch die vier Elementarische qualiteten verendert / vnd nach den selbigen witterung geschehen werden.

**D**ie Erste Reuolution des Winters ist geschehen im vorgegangenen 61 Jar / den 11 tag des Christmons / vmb 2 vhr / 57 min. nach mittag / do die Sonn angefangen hat / in den ersten grad des Steinbocks zu gehen. Dieselbig regiert fürnemblich Saturnus im Krebs / inn seinem hingergang / do er in einem kalten vñd feuchten Zeichen die Kälte duplicirt / Wie dann auch thun werden / Mercurius vnd die Sonne (Dann Mercurius stets durchs ganze Jar vmb die Sonne herum haspelt / vnd von jr vber 48 grad nit elongirt wird) in irer widerfan / Ad Zenich capitis nostri, inn den weitesten vñd nidigsten Winterischen Zeichen / dem Steinbock vnd Wassermom. Inn welchen die Kälte propter antiperistasin gemehret vñd zwifach gemacht wirdt / Dies  
weil



weil die Strahl der Sonnen vnd Mercurij/ zu vnserm Ho-  
 rizont oblique projicirn vnd auß gestrewet werden. In solcher  
 Kälte hilfft auch gewaltiglich/ die opposition Saturni vnd  
 der Sonnen/ welche auff den 15 tag Decembris jetzgenan-  
 tes 61 Jars geschicht. Darauß zu schlüssen ist/ das der win-  
 ter von dem newen Jenner an/ biß auff den 21 Februarij  
 des 62 Jars/ seer kalt wird sein / Vnd sich mit villem schnee  
 vnd vngestümen feuchten winden erzeugen werde/ vnans  
 gesehen das Jupiter vnd Mars/ in trucknen Zeichen ihren  
 lauff haben. Doch wird Mercurius vnd sonderlich die  
 Venus/ als die fürnembste herrscherin dises Jars/ sich zeit-  
 lich vntersehen / solche Kälte zu brechen/ Wie sie denn das  
 selbe thunn/ bald nach dem newen Merzen/ welcher den 3  
 Februarij in einem lufftigen/ warmen vñ feuchten zeichen/  
 vmb 6 vhr nach mittag eingehen wird/ Vnd die Venus ges-  
 leich den andern/ vñ Mercurius den vierden tag hernach/  
 auch in dasselbige zeichen / durch jren geschwinden Oriens-  
 talischen fürlauff lauffen werden/ Aber es wird nichts dest  
 weniger zimliche Kält widerumb folgen/ mit feuchten win-  
 den vnd schnee/ vnd nicht lang hernach die Wasser groß  
 werden.

**D**IE ander Reuolution des Frühlings / fehet an den 11  
 Martij/ vmb 1 stund 14 min. nach mittag/ wann die  
 Sonne anfecht in den ersten grad des Widers ein zu-  
 gehen / Vnd ist diese Reuolution die fürnembste vnter den an-  
 dern dreyen/ Dieweil inn erster erschaffung der Welt. die  
 Sonne/ als ein Illuminirer/ Herrscher/ regirer vnd modes-  
 rirer aller Planeten vñ gestirn/ in dem Zeichen des Widers  
 gefunden ist worden / Darinn sie auch als ein gewaltiger  
 Herrinn seinem Reich/ jre Exaltation hat/ vnd jre Maiestes  
 Darinnen beweist. Daruauß denn auch fürnemblich nach-  
 enderung vnd geschicklichkeit der Constellation in solcher Reuo-  
 lution die temperament der menschlichen Körper/ vnd sitten der  
 gemüter/ auch das wesen vnd natur / aller anderer vergens-  
 A ij klischen



elichen Creaturen / durch vnbegreifliche vnd verborgene  
Himliche einflussung / die meisten enderung Järlichen zu  
empfaben pflegē / In diser Reuolutiō befind ich / das der an  
fang des Glentzen feucht / vnstet / vnd etwas kalt wirt sein /  
von wegen Saturni im Krebs / Veneris vnd Mercurij inn  
den Vischen / als kalten vnd feuchten zeichen. Das mittel  
wird zum mehrern theil temperirt / warm / trucken / vnd  
lüfftig sein / außregierung Iouis vnd Martis / welche  
vast den ganzen Frühling iren lauffe inn den Zwillingen  
haben / Darzu geben auch fürdernuß / etliche Mansiones  
Lunæ vnd Martialische Aspect / zu den vnberweglichen  
Sternen / inn der Vesten des Himmels / Auß solchen vrsach  
chen / wirdt sich Laub vnd Gras / mit sampt der plüht  
zeitlich herfür thun / Aber wird nochmals denselbigen  
im außgang des Aprilen vnd anfang des Mayen / kalter  
Septentrionalischer winde vnd penetrabile frigus adurens  
gedriewet / Dardurch leider zu besorgen / das durch solchen  
schaden / aller fürnemen fruchten vnd gewächssen / thew  
rung werde erfolgen / welche thewung verlengert wer  
den wird / biß inn das 63. Jare / Etlich böser Aspect operas  
tion halben vnter einander / vnd sonderlich der Sonnen /  
Saturni vnd Veneris gegen etlichen vnberweglichen  
Sternen / primæ vnd secundæ Maiestatis / welche auff das  
selbige Jar / ob Gott will / ferner sollen erkläret werden.

**D**IE dritte Reuolution des Sommers fehet an / den  
12 Junij / mit dem eingange der Sonnen / inn den  
ersten grad des Krebs / achzehen minuten / vor mits  
tag. Der anfang dises Sommers ist feucht / küel vnd wind  
dig / mit Hagel vnd vngewitter / vast biß auff das mits  
tel / Von wegen das vast alle Planeten (ausgenommen  
den Jupiter / in einem wasserigem / kalt vnd feuchten Zei  
chen / nemblich im Krebs des Mons eignem hauß / im Jus  
nio iren lauff haben / vnd dorinnen nacheinander zusammen  
kommen



Kommen werden / welche coniunctiones mit sampt der nach-  
uolgenden Finsternuß / eine Ursache sein werden / einer  
Pestilenz vnd sterbens gegen dem Herbst / Dises vnd auch  
gegen dem Fröling des nachuolgenden 63 Jars / an vielen  
orten / vnter dem ersten vnd vierdten Quadrangel gelegen /  
Dann durch dieselbige / wird der Fröling wider seine tem-  
perirte natur in den vier qualitatibus / auß einem grossen excess  
vnd vberfluß der feuchtigkeit seer geendert / Zu gleicher  
weiß / wie auch dem anfang des Somers widerfarē wird /  
Darzu hilfft auch vil / die vergiffung des luffts inn sol-  
cher Finsternuß / Das mittel wird seer heiß sein / von wegen  
der Sonn / Monn / Martis / Veneris vnd Mercurij / wels-  
che inn einem ferwigen / heißen vnd truckenen zeichen der  
Sonnen hauß / nit weit von einander separirt vnd nach eins-  
ander zum theil coniungirt werden / dardurch grosse vnges-  
witter mit wind / hagel vnd donner / zur selbigen zeit geur-  
sacht werden / Diweil inn der vorigen kurz vergangenen  
coniunctionibus in wasserigem zeichen / vil kalter feucht mit vis-  
len hitzigen Exhalationibus durch der Planeten Strahl vnd  
heimliche Wirkung / im Erdreich erweckt vnd herauß ge-  
zogen sind worden / Vnd aber hernacher von den ferwigen  
coniunctionibus im Löwen / inn die mittle region des luffts erhos-  
ben / aldo nach irer art zu mancherley vngewitter gmacht.  
Diweil aber Saturnus von der coniunction der Sonnen am  
23 Junij seer geschwecht ist worden / also das seine radij nit  
haben zum Erdreich können kommen / vnd er auch sons-  
ten von seiner grossen höhe wegen / die radios nur zur eusser-  
sten grenze des höchsten obersten luffts spargirt / vnd die  
kalten außgezognen feucht auß dem Erdreich / Ob debilita-  
tem sui luminis nit verzeren kan / So volget / das zum mehrien  
theil Exhalationes / Item / hitzige / truckene / auch schwefeliche  
vnd bituminose materien werden bewegt werden / Darauß  
in diesem Jar ein Comet erscheinen möcht / sonderlich inn  
der obersten region des luffts / nahe bey dem Elementaris-  
schen



schen Feuer / do derselbig oberst lufft / mit sampt dem Cos-  
meten vnnnd Feuer / vnter der sphaera Lune circulariter mouirt,  
vnd von der beweglichkeit der Himelischen Körper mit ges-  
walt von Orient gen Occident gezogen / auff vnd vnter gehen  
wird / biß so lang dieselbige hizige materia vom Feuer ver-  
zert wird. Darzu hilfft auch gewaltiglich die Finsternuß /  
in welcher der Mon im schatten der Erden / durch verlies-  
rung seines Scheins / hefftig geschwecht ist / vnd derselbigen  
Schwechung halben / eine zeitlang auß dem Meer (dessen  
er sonst propter Dominum suum in humiditates / die fürtrefflichste vz-  
sache pflegt zu sein / seines zulauffens / im auffsteigen vnnnd  
ablauffens im vntergang / sonderlich der eussersten theilen  
des Oceani) vñ das Erdreich nit so wol als zunor / bewegē  
wird können / welcher vrsach halben / mehr hizige Exhalati-  
ones denn kalte uapores herauß gezogen werden / darauff zu  
schliessen / grosse hitz / dürre vnd truckene des andern theyls  
des Sommers.

**D**ie vierde vnnnd letzte Reuolution des Herbsts / fehet sich  
an mit dem eingang der Sonnen inn den ersten grad  
der Wag / am 14 Septembis / vast ein halbe stunde  
vor mittag / Der September ist vnstet / feucht / windig vnd  
vngestüm / aber im October volgt widerumb schön wet-  
ter / Darnach widerumb vil Schnees vnd kalte regen / biß  
auff den newen Christmon / welcher durch auß kalt / win-  
dig vnd feucht wird sein. Es pflegen auch die Astrologi  
ein sonders Capitel / von dem gewitter des ganzen Jars  
auff alle new / volle / vnd genirete Monatschein / in der Prac-  
tick zu stellen / Aber dieweil man dieselbigen im Calendario  
findet / wil ichs von kurtze wegen / jezundt beruben lassen /  
vnd nit widerumb repetiren.

### Das III. Capitel / von wach- sung der Fruchte.

In



**I**n vorgehendem Capitel / habe ich nach außweisung  
der vier Reuolution / das gewitter durchs ganze Jhar  
in gemein angezeigt / Doraus wol zu mercken / wie die  
frucht geraten werden / Aber auß sonderlichen andern mit  
bedeutungen / etlicher Constellation / befinde ich grosse miß-  
wachsung an Wein vnd getreide / Dann zubeforgen / das  
der Wein im Aprillen vnd anfang des Mayen / durch frost  
reyffen / Kalte regen / vnd kulem wetter / mercklichen schade  
empfahen werde / Welcher schad auch hernacher / durch  
Hagel vnd vngewitter / an vilen orten wird gemehret wer-  
den / von wegen der coniunction Saturni vnd Martis im  
Krebs. Dieweil aber der gutig Jupiter vnd Mars / bald  
nach irer coniunction / welche am 15 Martij inn der letzten  
gradibus des Stiers geschicht / in das lufftige / warme vnd  
feuchte zeichen der Zwilling einget / möchte sie solche miß-  
wachsung durch m ittegliche winde / vnd feuchtem lindem  
wetter / zeitlich mildern vnd verhindern / Wo solchs gesche-  
he / so würde zimlich gute / vnd vil frucht wachssen. Ferner  
befinde ich neben erzelten vrsachen / das hewer wenig Obs  
werden wird / Aber vil Hewes vnd gute fütterung des Vie-  
hes. Der Flachs / vnd sonderlich der spate Flachs / vnd das  
zrommet wird durch dürre verhindert werden. Oels vnd  
Hönigs wird ein zimliche notturfft bekomen. Kraut / Ru-  
ben / vnd andere legumina oder Kuchenspeiß / werden hewer  
auch zimlich gerathen.

### **Das III. Capitel / von vrsachen / wa- rumb der Astrologorum Prognostica von den witterungen nit allezeit gewiß sindt.**

**I**n disem ort hab ich nicht vnterlassen wollen / ein sun-  
ders Capitel zu schreiben / von vrsachen / Warumb der  
Astrologorum prædictiones von den tempestatibus vñ  
vngewitter



vngewitter / so auß rechter natürlicher Kunst der Physiolo-  
gy beschriben mögen werden / nit allweg ergehen / noch not-  
wendig erfolgen / sondern etwan das widerspiel zum off-  
termal erscheinet. Es schreibet Aristoteles inn einem Buch /  
De generatione animalium / das die prædictiones meteoron  
als des schnehes / hagels / Regens / Cometen / wind / vnd an-  
derer meteoron bey den Astrologis vngewiß / vnd betriegs-  
lich seyen / vnd sagt das solchs geschehe *διὰ τὴν τῆς ὑλῆς ἀόριστον*  
Id est propter infinitatem materiae subiectæ. Wie solches zu-  
uerstehen sey / wirdt bald hernacher volgen. Die Cœlestis  
efficatia oder causa efficiens ist wol gewiß / Aber der Effect,  
welcher in den vier Elementen geschicht / ist vngewiß / also  
dz auch die Astrologi nit allweg gewiß / von den witterungē  
schreiben können. Dann ob wol die gestirn irem positu vnd  
efficatia nach bedeuten / das an einem ort solche uapores Ex-  
halationes oder sonst andere materien, auß dem Erdreich  
inn den lufft auff gezogen werden solten / Darauß etwan  
wind / etwan Regen oder Schnee geschaffen würde / So ist  
doch nit allweg gewiß / das solchs also erfolgen muß. War  
ist es / das die vnderste Welt / vnd alles was drinnen ist / von  
den öbern Himlischen Cörpern vnd iren umbwelzungen /  
welche gewisse krafft haben / geregirt werden / durch heim-  
liche einfließung / Vnd wie dieselbigen mit mancherley As-  
pecten geschaffen vnd gestaltet sein / das auch also dise vns-  
derste ding geregirt werden / Aber doch geschichts zufäls-  
liger weiß / das solche einfließung nit allweg iren Effectum  
mit sich bringen. *Eò quòd materia subiecta, subinde aliter atq;  
aliter sese habeat, uarijsq; in locis ac temporibus diuersimodè  
sit affecta nec una maneat, sed dissimilis eius sit dispositio.*

Darumb können auch die Astrologi nit allweg gewiß  
prognoſticiren / vnangesehen / das die Himlischen Cörper  
ire gewisse operation krafft vnd Wirkung haben / vnd sol-  
che Effect gewiß bedeuten. Vnd ob sichs schon begibt / das  
solche materien auß gewisser krafft der Himlischen Cörper  
an einem



an einem ort auff gezogen sind / ist es doch abermals ungewis / das dieselbigen eben in dem Horizonte / do sie bewegt sind worden / zu solchen meteoris müssen gemacht werden / vnd an demselbigen ort außbrechen / Dann sie bleiben nicht allweg in einem Horizonte , sondern werden etwan vonn winden fort getriben / an andere mancherley ort / do sie als ler erst sich ereygen / vñ mit gewalt außbrechen . Die Astrologi können solche ding wol prognosticiren / aber nit allweg gewis / an welchen ortern sie geschehen solten . Es bricht offft auß / vñnd kompt ein wetter mit wind / donner / blitz / vnd hagel / an einen ort / do es doch nit entsprungen / sonder in einem andern Horizonte durch der Planeten vnd Sternenn Krafft / auß dem Erdreich vnd Meer gesamlet ist worden / vnd vber vil meylen herkompr . Dann solche grosse wetter vnd ungewitter (gleich wie auch alle andere meteo-  
ora) müssen geschehen / Cum motu & multis alterationibus . motus uero & commutationes fiunt in tempore , ideoq; meteo-  
ora omnia durationem temporis ad sui generationem requi-  
runt , alia plus alia minus , pro ea natura , qua quaedam ocys  
quedam tardius fiunt . Darumb müssen sie weil darzu ha-  
ben . Also sagt auch Christus im Euangelio / Das wir mens-  
schen des windes sausen wol hören / aber nit wissen können /  
von wannen er komme / vñnd wo er hin fare . Das ist / wir  
können nit wissen das ort / an welchem der wind auß einem  
mitlen temperament vnd mixtur uaporis vnd Exhalationis  
generirt werde / vnd den lufft anfahe zu treiben / können  
auch nit wissen / wie fern er gehe / vnd in den lufft verwan-  
delt werde . Gleichwol können wir generaliter wissen / von  
welchem winckel des Horizonts der wind komme / vnd wo  
hin er gehe / Als / wann wir sagen / der wind geht von No-  
genlande / vom Mittage / vom Uidergang / ic . Aber das  
καὶ δὲ καὶ σοὶ hoc est : singularem loci conditionem , inn welchem  
der wind anfahet oder auffhöret / können wir nit wissen  
wissen / noch mit fingern zeigen . Zu dem allen / ob schon ein  
B ij gewisse



gewisse constellation oder triplicitet ist / sic sey feuriger / lufftiger / wasseriger oder yrrdischer natur / so ist doch die materia nit allweg vorhanden / Darauf nach anzeigung solcher tripliciteten vnd constellation ettwann Regen / Wind / Cometen vnd dergleichen erfolgen müsten. So erfahren wir auch / das der Orion, welcher vmb den anfang des Herbsts / Järlichen auffgehet / vnnnd vmb den anfang des Winters vnter gehet / nit allweg zu den selbigen zeitten vngestümme winde / vnnnd vngewitter auff dem Meer vnnnd Erdreich bewege / also auch die wind Etesia Ecnephia genannt / wehen nit alle Jar zu irer gewöhnlichen zeit / das geschicht alles propter ἀόριστον materiae. Quare animaduertendū est prognostica & omnia tempestatum signa, non esse τακτικά. Id est, talia quæ ex necessitate habeant coniunctum & coherentem effectum, sed ἰκόντα tantum, & contingentia quæ ut plurimum fieri solent.

**Das V. Capitel / von den Finsternissen / vnnnd andern bösen Aspecten / der dreien obersten Planeten gegen einander / auch derselbigen bösen constellation gegen der Sonne.**

**I**n diesem 62. Jar wird der Mon auff den 16 tage des Hermons im 3 grad des Wassermans / bey dem Drachenhaupt im schatten des Erdreichs / auff 15 punct 30 minut. groß / ganz vnd gar befinstert. Der anfang solcher Finsternuß ist vmb 2 vhr 15 minut. vor mittage. Das mittel vmb 4 vhr 5 minut. Das ende vmb 5 vhr 55 minut. Vnd weret diese Finsternuß vom anfang biß zum ende 3 stund 40 minut. Die ganze befinsterung des Mons inschatten der Erden / fahet an / vmb 3 vhr 24 minut. vnnnd bleibet also schwarz vnd vertunckelt 1 stund 22 minuten. Darnach wirdt er ansahen / auß dem schatten der Erden  
sittiglich



sittigklich zu gehen / Vnd den schein vnd glantz / von der  
Sonnen widerumb empfahen / In maß vnd gestalt / wie er  
im eingang in den schatten / denselbigen verloren hat. Von  
diser Finsternuß wird nur das halbe theil bey vns gesehen /  
Das ander halbe theil wird gesehen werden inn Hispania /  
Francreich / Hibernia / vnd andern occidentischen orten.

Sonst wirdt noch eine kleine Finsternuß der Sonnen /  
auff den 3 Februarij / im 24 grad des Wassermans / nicht  
weit vom Drachenkopff / ist 2 puncten 22 minnuten groß /  
Ihr anfang ist vmb 5 vhr 18 minut. nach mittag / Das mittel  
vmb 6 vhr 9 min. Das ende wirdt gerad vmb 7 vhr vnd  
kein minut. Ihre ganze werung ist 1 stund 42 minut. Dieß  
weil aber die Sonne in vnserm Horizonte zur selbigen zeit  
vor fünffen vntergehet / so wirdt dise Finsternuß nicht bey  
vns / sondern bey den occidentischen gesehen werden.

Ferner erzeigen sich auch etlich diewende böse Aspect  
der dreyen obersten Planeten / Nemlich / am 15 Martij /  
eine zusammenfügung Jouis vnd Martis / im 28 grad  
des Stiers. Auff den 14 May eine coniunction Saturni  
vnd Martis / im 5 grad des Krebs. Am ersten Octobris  
ein geuerter schein Jouis vnd Martis / im 5 grad des  
Krebs vnd der Wage. Vnd widerumb am 26 Octobris  
ein geuerter Saturni vnd Martis / im 21 grad des Krebs  
vnd der Wag. Es erscheinen auch andere böse configura-  
tiones Saturni vnd Martis gegen der Sonnen / Nemlich /  
am 11 Martij / am 23 Junij / am 26 Augusti / am 5  
Octobris / vnd am 29 Decembis / Wie sie dann allesampt  
inn meinem Calender an jren tügen / verzeichnet gefunden  
werden. Was solcher Finsternuß vnd böser Aspecten ope-  
ration vnd wirckung sey / wirdt inn den vorgehenden vnd  
nach geschribenen Capiteln dieser meiner Practick zum  
theil angezeigt.

**B ij Das**



## Das VI. Capitel / von Kriegsz- leufften / vnd vnfride.

**S**zweil Saturnus ein Herr der Finsternuß ist / vnd nach der Venere ein herischer dises Jars / Auch 6 mal in den bösen drewenden aspectibus durch zusammenfügung / genierte vnd gegenschein / wider die Sonne vnd den Mars tem gefunden wird / So ist auß deren operationen vnd effecten / fleissiger betrachtung zu schliessen / vnd zuerachten das im Römischen Reich / bey geistlichen vnd weltlichen / grosse zwitteracht vnd vneinigkeit entstehen werden / Dar auß grosse enderung in weltlichen / vnd besonder inn religions sachen zu befaren / Vnd werden auffrühr / empörung / vñ zerstörung / raubē / morden vnd pennen gedrewt etlichen Landen vnd Stetten / dem Widder / Wage / Stier / Löwen / Schützen vnd Vischen vnterworffen. Solches vnglück wird in disem 62 Jar bald nach der Finsterniß / vnter dem Löwen / Wag vnd Vischen herfür brechen / wider die jhenis gen / so gegen mitternacht wonen / Vnd werden doch zu beiden theilen zweiffelhaftig stehen. Disem vnglück werden die mitnächtigen wol widerstehen können / wo sie einig sein vnd bleiben / dann es wird inen glücklich gehen wider ihre feinde / bis in das 63 jar / In welchem aller ersten der Martius furor grassiren wird / vnd die gemüter der Potentaten entzünden / sonderlich dieweil auch eine truckne constitutiō des luffts / vnd ein dürres Jar sein wird / darinn auch die gestirn abermals vil Exhalationes vñ bituminosas materias in den obersten lufft auffziehen werden / Dorauff ein roter Comet von der natur Martis erfolgen / vnd mit sampt der schrecklichen grossen coniunctiō Saturni vnd Jouis im Löwen / eines großmechtigen Potentaten abgang bedenten wird / Durch welches abgang grosse zwitteracht / vnd Krieg werden entstehen / in Teutscher vnd Welscher Nasion.



tion. In dem selbigen 63 Jar/wird auch der Babst an vie-  
len orten angegriffen werden / vnd seine Römische Kirche  
not leiden/biß in das 64 Jar/ Vnd werden als denn die sachen  
noch gefehlicher stehen/vnd grosse mutationes erfol-  
gen/von wegen der zweier Finsternissen der Sonne vnd  
Mons/welche in einem Monat geschehen / desselbigen 63  
Jars / In welchem Mars der fürnembste Herr vnd Herr-  
scher des ganzen Jars/ vnder allen anderen Planeten sein  
wirdt/inn der andern Reuolution, in angulo orientali starck  
regierend befunden/ vnd mit den meisten dignitatibus bes-  
gabt ist/ Dazu denn auch die andern bösen Aspect der ober-  
ren Planeten/gegen vnd wider einander/nit kleine fürders  
nuß vnd hilff geben werden. Auff solches wird abermals  
die grosse coniunctio Saturni vñ Jouis / im 64 Jar zwey-  
mal geschehen / mit einer geuerten bösen anschawung  
Martis vnd Mercurij. Vnd werden auch in demselbigen  
Jar/alle Planeten in ein zeichen kommen / in den Löwen/  
der Sonnen eignem hauß/vnd dorinn zum teil coniungirt  
werden/Vnd mit sampt andern causis durch ire effect/der-  
massen grosse enderung im Römischen Reich bringen/der-  
gleichen in langer zeit nit erfahren worden. Vnd wird sich  
der Türck vnter stehen/ mit grosser macht/wider Teutsche  
vnd Welche Nation zu Kriegen. Dann solche grosse con-  
iunctiones / vnd bewegung der Himelischen Krefften/seind  
zu keiner zeit vergeblich geschehen / Wie wir dann erfahren  
haben/das die grosse constellation/ so im 1524. Jar gesche-  
hen/den Barrenkrieg/in nechstuolgendem 25 Jar bedens-  
tet hat/ıc. Vnd man wird leider erfahren/ das von den al-  
ten Astrologis nit vnrecht geweissagt ist / Anno sexagesimo  
caueat sibi omnis Homo. Das ist/ weil man noch etlich vnd  
sechzig zelt/vnd noch sechzig genennet wirdt/ soll sich mes-  
niglichen fleißig hüten/ vnd für vbel vorsehen. Darumb  
sollen wir Gott vor augen haben / buß thun/vnd vnser les-  
ben bessern/ auch nit so sicher vnd rohloß sein / oder sagen/  
Pax



Pax & securitas. Damit wir nit mit einem grossen ungestümmen wetter/das mit einem nubecula anzufahen / vnd bald darnach schnell/den ganzen Himmel vnterziehen pfleget/vnuersehener sache vber fallen werden/ vnd dorinn not leiden müssen.

## Das VII. Capitel / von mancherley Kranckheiten/so sich in diesem Jar ereygen werden.

In andern Capitel hab ich zum theil vrsach angezeiget/ Warumb/vnd zu welcher zeit des Jars / ein Sterben vnnnd Pestilenz sey zubeforgen / Zu den selbigen gibt auch grosse fündernuß/die vngleich/vnnatürlich/vñ widerwertige constitution des luffts/in den vier zeiten des ganzen Jars/Vnd besonder die Finsternuß des Mons / darinn der lufft seer vergifft worden ist/ fürnemblich bey den occidentischen/in Vnderlandt/ auch im Elsaß/vnd am Rheinstrom/ vnd an etlichen orten im Wirtenberger landt/vnnnd im Francken land/Sonst werden auch nach enderung des luffts/in den vier qualiteten in diesem Jar/ viel andere tödtliche vnnnd böse schnelle Kranckheiten / die da populariter grassiren werden/manigfeltiglichen sich an vilen orten zu tragen/bey jungen vnd alten/ Als Pestilenz/vberscharpffe hitzige/brennende vnd faule fiber / Der ganze vnnnd halbe Schlag/fallende sucht/seytten geschwer. hitzige augen wee/rote ruhr vnd darmgicht / Item die Vrschlecht wird bey den Kindern gemein sein/gegen vnd in dem Fruling / Es wird auch das Hüfftwee / Wassersucht vnnnd Podagra gemein sein.

Das



## Das VIII. Capitel / von den Stenden der Menschen.

**D**IE Menschen so vnter dem aller obersten Planeten Saturno geboren sind / werden in disem Jar mehr vns glück denn glück haben / vnd sonderlich den anfang des Frülings / vnd mittel des Herbsts zu wider spüren. Es werden auch im Mertz etlichen gewaltigen Herren / vmb das end der ersten / vnd anfang der andern Reuolution sorgliche quartan Siben gedrewet / sonderlich mögen sie sich für sehen im Herbstmon vnd Weinmon. Die ihenigen so vnter dem Planeten Jupiter geboren sindt / von welchem sie auch gemeiniglich zu grossem glück / reichthumb vnd hohen ehren pflegen gebracht zu werden / haben in disem Jar das widerspil zu gewarten / Dann Jupiter wird im achten hauß / inn der wonung des todtes / vom Marte als seinem natürlichen feind / in der coniunction im zeichen des Stiers seer geschwecht vnd vnter gedruckt / Darumb werden den Iouialischen Herren vnd Potentaten / gefehliche Kranckheiten gedrewet / Vnd wird etlichen mit gifft nach gestellet werden / welche auch / so sie Krieg an fahen / nicht vil glücks darinnen haben / sondern vil mehr schadens vnd nachtheil an Landen vnd Leuten befinden. Welche vnter dem Marte in dise Welt geboren sindt / werden in disem / vnd nachfolgenden 63 Jar / in Kriegshendeln gut glück spüren. Der Sonnen Kinder / vnd etliche Potentaten vnter derselbigen geboren / werden in irer regierung gegen mitternacht vnd gegen morgenland guten fride / vnd gehorsam irer vnterthanen befinden / Aber gegen mittag / vnd sonderlich gegen abent / ist auffrhr vnd vngheorsam wider die Oberkeit zu besorgen / der Sonnen Finsternuß halben / so inn disem Jar auff den 3 Februarij geschicht / Darzu wird auch helfen die coniunctio Saturni vnd Martis / welche am 14 May geschicht.

C



geschicht. Venus Kinder werden diß Jar den merern teyl  
in guter gesundheit leben / vnd glück spüren. Des Mons  
Kinder werden glück empfinden / vom anfang des Jars/  
biß auff den 16 tag des Hermonats / daran der Monn be-  
finstert wird / die vbrige zeit des Jars wird ihnen zu wider  
sein. Mercurij Kinder werden in disem Jar sorgfeltig in  
jren hendelen stehen / vnnnd mit mancherley Kranckheiten  
beladen / Aber etlich fürnemblich Mercurialische Theologi  
werden an vil orten Teutscher Nation / von Rhums / Hof-  
farts vnnnd eytteler Ehrgeitzigkeit wegen / inn der heyligen  
Christlichen waren Religion / grosse yrrthumb erwecken /  
zwisspaltig sein / vnd nit allein den armen gemeinen Man-  
sundern auch jre Oberkeit irre machen / welches zu grosser  
vneinigkeit der Herrn vnter einander gereichen wird / vnd  
auch andere sachen vnter solchem schein / möchten herfür  
brechen. Es ist Teutschlandt nu mehr des Euangelij / vnd  
reiner Christlicher Lehre sat worden / wil etwas neues / vnd  
newe spitzfündige außlegung der heyligen Schrifft haben /  
vnd werden lezlich jrer vil schier zu heimlichen Juden vnd  
Epicurer. Darumb wird GOTT von wegen solcher vns  
danckbarkeit / sicherheit / vnd grosser laster / so yetzund inn  
vollem schwang gehen / vnd für keine sünde mehr / sondern  
für gemeine gewonheiten / vnd löblich sitten gehalten wer-  
den / die Welt straffen / Vnd ist zubesorgen / das Teutsche  
landt mit Schwerd / Hunger vnd Pestilentz / kürzlich wer-  
de heimgesucht werden. Solches dirowet vns Gott durch  
die Finsternussen / vnd grossen constellation / die in den Him-  
meln in den nechsten dreyen Jaren / nach einander gesche-  
hen werden / Ich will geschweigen / der manigfaltigen /  
schrecklichen wunderzeichen / die in disem 62 vnd vorgang-  
genem 61 Jar / hin vnd wider am Himmel / vnd auff dem  
Erdreich sindt gesehen worden / Als inn der Grabschafft  
Zenneberg / zu Nürnberg / zu Bamberg / im Behemischen  
vnd Meißnischen grenzenthäl / vnnnd anderen orten mehr.  
Item /



Item / das Wunderzeichen / welches an einem bach gesehen  
ist worden / nahe an einem Drosse / vndern Haymbach  
genandt / inn der Graffschafft Hohenlöe / eine Meil weg  
von Oringen gelegen / welcher den 15 Aprilis am Osters  
montag im 60 Jar angefangen hat / blut rot zu sein / vnd  
also neun tage bliben / Vnd ist der bach vber 400 schrit lang  
also blut rot gewesen / Aber ober vnd vnterhalb hat er seine  
vorige natürliche farbe behalten. Solches wunderzeichen  
hab ich selbst vnd andere etlich hundert personen gesehen /  
vnd hab aber kein natürliche meteorologische ursache diser  
blut roten farben finden können. Solche vnd dergleichen  
Wunderzeichen / sindt nichts anders / dann Vorpotten der  
straffe / vber vnser Sünde. Darumb sollen wir buß thun /  
vnser leben bessern / vnd bitten / das der barmhertzig gütige  
Gott / die wol verdiente straffe / genediglich vnd  
väterlich von vns abwenden wolle / Vmb seines  
lieben Sons vnser einigen Herren vnd  
Erlösers Ihesu Christi willen.  
A M E N.

Gedruckt zu Nürnberg!  
durch Valentin Newber.






Faint, illegible text, likely bleed-through from the reverse side of the page.

Faint, illegible text, likely bleed-through from the reverse side of the page.















12.

Das Jar/  
durch Gregorium  
Philosophy bnd  
orem zu  
estelc.

dises Jars

Mars. Mercurius.



g(1571)

